

## Ո Ր Ո Շ ՈՒ Մ N 610

### վարչական տույժ նշանակելու մասին

12 մայիսի 2023թ.

ք.Գյումրի

Հայաստանի Հանրապետության պետական եկամուտների կոմիտեի Հյուսիսային մաքսատուն-վարչության պետ Հարություն Ազգալրյանս, քննելով Վրաստանի Հանրապետության քաղաքացի Կոնստանտին Համայակի Մեծոյանի (բնակության հասցե՝ Վրաստանի Հանրապետություն, ք.Ախալքալաք, Թումանյան 30, ծանուցման հասցե՝ ք.Երևան, Արշակունյաց 4, անձնագիր՝ 15BB18197, ծնված՝ 10.07.1986թ.) կողմից մաքսային կանոնների խախտման վերաբերյալ գործը,

### Պ Ա Ր Զ Ե Ց Ի

Կոնստանտին Համայակի Մեծոյանի անվամբ թիվ 05100022/260322/0000682380 մաքսային մուտքի օրդերով 365 օր ժամկետով՝ մինչև 26.03.2023 թվականը Հայաստանի Հանրապետություն է ներմուծվել 2003 թվականի արտադրության MERCEDES-BENZ E500 մակնիշի, NN466MM պետհամարանիշի, WDB2110701A16133 նույնացման համարի ավտոմեքենա: Սահմանված ժամկետում նշված ավտոմեքենան չի արտահանվել, որի արդյունքում խախտվել է հետադարձ արտահանման պարտավորությունը:

ՀՀ ՊԵԿ Հյուսիսային մաքսատուն-վարչության Բավրայի մաքսային կետ-բաժնի 3-րդ բաժանմունքի պետի կողմից 07.04.2023 թվականին Կոնստանտին Համայակի Մեծոյանի նկատմամբ կազմվել է մաքսային կանոնների խախտման վերաբերյալ արձանագրություն «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտման հատկանիշներով:

Նշանակվել է վարչական գործի վարույթի լսումներ 10.05.2023թ. ժամը 12:00-ին և գործի քննություն 12.05.2023թ. ժամը 16:00-ին, ծանուցումը պատշաճ կարգով ուղարկվել է կողմին:

Կոնստանտին Համայակի Մեծոյանը 10.05.2022 թվականին էլեկտրոնային եղանակով դիմում է ներկայացրել ՀՀ ՊԵԿ Հյուսիսային մաքսատուն-վարչության պետին (մուտք թիվ 930), հայտնելով որ 26.03.2023թ. թիվ 05100022/260322/0000682380 ՄՄՕ-ով ՀՀ տարածք է ներմուծել 2003թ. արտադրության MERCEDES-BENZ E500 մակնիշի NN466MM պետհամարանիշի ավտոմեքենա: Ավտոմեքենան տարածք է ներմուծել ավտոքարշակով, քանի որ ավտոմեքենան մինչև 26.03.2022թ.-ի ներմուծումը գտնվում էր ՀՀ տարածքում և շահագործման ենթակա չէր: Ժամանակավոր ներմուծման ժամկետը չխախտելու համար ավտոմեքենան 26.03.2022թ. ՀՀ տարածքից արտահանում և ներմուծում է կատարել նույն վիճակում, ինչ վիճակում ավտոմեքենան գտնվում է հիմա: 25.03.2023թ. ավտոմեքենան ավտոքարշակով հասցրել է Բագրատաշենի մաքսային կետ, սակայն իրեն չեն թույլատրել մեքենան արտահանել: 12.05.2022թ. թիվ Դ/13887-2022 գրությամբ դիմել է ՀՀ ՊԵԿ նախագահին՝ խնդրելով թույլատրել ավտոմեքենան ավտոքարշակով արտահանելու ՀՀ տարածքից: Խնդրել է նաև ժամկետը բաց թողնելու համար չկիրառել տույժեր, տուգանքներ և տեղեկացնել իրեն ավտոմեքենայի ոչնչացման

հետ կապված ընթացակարգերի վերաբերյալ հետագա քայլերի հաջորդականության մասին: Սակայն որևէ պատասխանի չի ստացել: Հայտնել է նաև, որ 04.04.2023թ. ավտոմեքենան ավտոքարշակով հասցրել են Բավրայի մաքսային կետ, բայց իրեն չեն թողել արտահանել ավտոմեքենան և առաջարկել են գրավոր դիմել մաքսատան պետին:

ԵՏՄ մաքսային օրենսգրքի 264-րդ հոդվածի 5-րդ մասի համաձայն՝ ժամանակավոր ներմուծված անձնական օգտագործման տրանսպորտային միջոցները, մինչև այն ժամկետի լրանալը, որի ընթացքում այդ տրանսպորտային միջոցները կարող են ժամանակավոր գտնվել Միության մաքսային տարածքում, Միության մաքսային տարածքից արտահանման, ազատ շրջանառության համար բացթողման կամ սույն հոդվածին համապատասխան այլ նպատակներով ենթակա են մաքսային հայտարարագրման, բացառությամբ այն դեպքերի, երբ նշված անձնական օգտագործման տրանսպորտային միջոցները դատարանի որոշմամբ բռնագրավվել կամ դարձվել են անդամ պետության սեփականություն (եկամուտ) կամ, սույն Օրենսգրքի 16-րդ հոդվածի 2-րդ կետին կամ 382-րդ հոդվածի 6-րդ կետին համապատասխան, ձեռք են բերել Միության ապրանքների կարգավիճակ կամ, նշված անձնական օգտագործման տրանսպորտային միջոցների հետ կապված, ի հայտ են եկել սույն Օրենսգրքի 14-րդ հոդվածի 7-րդ կետի 8-րդ ենթակետով նախատեսված հանգամանքներ:

Մինչև այն ժամկետի լրանալը, որի ընթացքում ժամանակավոր ներմուծված անձնական օգտագործման տրանսպորտային միջոցները կարող են ժամանակավոր գտնվել Միության մաքսային տարածքում, հայտարարատուն իրավունք ունի այդ տրանսպորտային միջոցները սույն Օրենսգրքով սահմանված կարգով ձեակերպելու «մաքսային տարանցում» մաքսային ընթացակարգով:

Այն ժամկետը լրանալու դեպքում, որի ընթացքում ժամանակավոր ներմուծված անձնական օգտագործման տրանսպորտային միջոցները կարող են ժամանակավոր գտնվել Միության մաքսային տարածքում, այդ տրանսպորտային միջոցները սույն Օրենսգրքով սահմանված կարգով ձեակերպվում են «մաքսային տարանցում» մաքսային ընթացակարգով, կամ այդ տրանսպորտային միջոցների համար իրականացվում է մաքսային հայտարարագրում՝ արտահանման, ազատ շրջանառության համար բացթողման կամ սույն հոդվածին համապատասխան այլ նպատակներով:

Ժամանակավոր ներմուծված անձնական օգտագործման տրանսպորտային միջոցները, անդամ պետությունների օրենսդրությանը համապատասխան, առգրավելու կամ դրանց վրա արգելանք դնելու դեպքում անձնական օգտագործման այդ տրանսպորտային միջոցների համար ժամանակավոր ներմուծման ժամկետի ընթացքը կասեցվում է:

Ժամանակավոր ներմուծված անձնական օգտագործման տրանսպորտային միջոցների առգրավումը կամ դրանց վրա արգելանք դնելը վերացնելու մասին որոշում ընդունելու դեպքում անձնական օգտագործման այդ ապրանքների համար սահմանված ժամկետի ընթացքը վերսկսվում է այդ որոշումն օրինական ուժի մեջ մտնելու օրվանից, բացառությամբ այն դեպքերի, երբ անձնական օգտագործման այդ տրանսպորտային միջոցների առգրավումը կամ դրանց վրա արգելանք դնելը կապված է եղել ժամանակավոր ներմուծված անձնական օգտագործման տրանսպորտային միջոցները Միության մաքսային տարածքում փոխանցելու՝ սույն հոդվածի 9-րդ կետով նախատեսված պայմանը հայտարարատուի կողմից խախտելու հետ:

Ժամանակավոր ներմուծված անձնական օգտագործման այն տրանսպորտային միջոցները, որոնց հետ կապված, մինչև սույն հոդվածի 1-ին կետում կամ 2-րդ կետում նշված ժամկետը լրանալը չեն իրականացվել սույն կետով նախատեսված գործողություններ, արգելանքի են վերցվում (արգելապահվում են) այն անդամ պետության մաքսային մարմնի կողմից, որի տարածքում գտնվում են այդ տրանսպորտային միջոցները՝ սույն Օրենսգրքի 51-րդ գլխին համապատասխան, բացառությամբ այն դեպքի, երբ մինչև այդպիսի արգելանքի տակ վերցնելն ի հայտ են եկել սույն Օրենսգրքի 268-րդ հոդվածի 2-րդ կետի 5-րդ ենթակետում նշված հանգամանքները:

«Մաքսային կարգավորման մասին» ՀՀ օրենքի 301-րդ հոդվածի 1-ին մասի համաձայն՝ մաքսային կանոնների խախտում է համարվում անձի կատարած անօրինական գործողությունը կամ անգործությունը, որն ուղղված է Հայաստանի Հանրապետության մաքսային օրենսդրությամբ և մաքսային ոլորտին առնչվող Հայաստանի Հանրապետության միջազգային պայմանագրերով Հայաստանի Հանրապետության պետական սահմանով տեղափոխվող ապրանքների և տրանսպորտային միջոցների մաքսային հսկողության և մաքսային ձևակերպման սահմանված կարգի դեմ, և որի համար սույն օրենքով նախատեսված է պատասխանատվություն:

Նույն հոդվածի 2-րդ մասի համաձայն՝ Ֆիզիկական և պաշտոնատար անձինք մաքսային կանոնները դիտավորյալ կամ անզգուշորեն խախտելու համար ենթակա են պատասխանատվության:

«Մաքսային կարգավորման մասին» ՀՀ օրենքի 309-րդ հոդվածի 1-ին մասի համաձայն՝ Ֆիզիկական անձանց կողմից հետագա արտահանման պարտավորությամբ Հայաստանի Հանրապետություն ներմուծված անձնական օգտագործման տրանսպորտային միջոցները սահմանված ժամկետում Հայաստանի Հանրապետությունից չարտահանելը, եթե հետագա արտահանման պարտավորությունը խախտվել է ավելի քան տասն օրով՝ առաջացնում է տուգանք՝ ֆիզիկական անձանց կողմից այդ տրանսպորտային միջոցներն ազատ շրջանառության համար բաց թողնելու նպատակով ներմուծելու համար նախատեսված մաքսային վճարների (բացառությամբ մաքսային մարմինների կողմից մաքսային գործառնությունների իրականացման համար գանձվող պետական տուրքի) մեծության տասը տոկոսի չափով, բայց ոչ պակաս, քան երեսուն հազար դրամի չափով:

Կոնստանտին Համայակի Մեծոյանի անվամբ թիվ 05100022/260322/0000682380 մաքսային մուտքի օրդերով հայտարարագրված տրանսպորտային միջոցը սահմանված ժամկետի ավարտին հաջորդ օրվա՝ 27.03.2023 թվականի դրությամբ «Ներքին սպառման համար բացթողում» մաքսային ընթացակարգով հայտարարագրելու դեպքում կառաջանան մաքսային վճարներ՝ ընդհանուր 11.860.845 ՀՀ դրամի չափով (հիմք՝ մաքսային գործառնությունների բաժնի պետի զեկուցագիր):

Ինչ վերաբերում է 12.05.2022թ. թիվ Դ/13887-2022 գրությամբ ՀՀ ՊԵԿ նախագահին ուղղված դիմումին, Կ.Մեծոյանին պատասխանվել է ՀՀ ՊԵԿ նախագահի տեղակալի կողմից 10.06.2022թ. թիվ 03/3-2/41002-2022 գրությամբ և դիմումի պատասխանն ուղարկվել է դիմումատուի կողմից իսկ նշված էլեկտրոնային հասցեին՝ 717178@gmail.com:

Այսպիսով, վարույթի նյութերով հիմնավորվում է, որ Կոնստանտին Համայակի Մեծոյանը սահմանված ժամկետում չի արտահանել 05100022/260322/0000682380

մաքսային մուտքի օրդերով ՀՀ ներմուծված ավտոմեքենան, ինչով պայմանավորված՝ թույլ է տվել «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտում:


Ելնելով վերոգրյալից և ղեկավարվելով ՀՀ մաքսային օրենսգրքի 13-րդ բաժնով և Վարչական իրավախախտումների վերաբերյալ ՀՀ օրենսգրքի 214-րդ, 234-րդ հոդվածներով՝

### Ո Ր Ո Շ Ե Ց Ի

1. «Մաքսային կարգավորման մասին» ՀՀ օրենքի 309-րդ հոդվածով նախատեսված մաքսային կանոնների խախտում կատարելու համար Կոնստանտին Համայակի Մեծոյանին ենթարկել վարչական պատասխանատվության՝ տուգանելով 11.860.845 ՀՀ դրամ մաքսային վճարների տասը տոկոսի չափով՝ **1.186.085 ՀՀ դրամ**:
2. Որոշման մասին հայտնել Կոնստանտին Համայակի Մեծոյանին՝ պարզաբանելով, ՀՀ մաքսային օրենսգրքի 221-րդ հոդվածի 2-րդ մասի համաձայն՝ որոշումն ուժի մեջ է մտնում կայացման պահից: ՀՀ մաքսային օրենսգրքի 222-րդ հոդվածի համաձայն՝ որոշումը կարող է բողոքարկվել վերադաս մաքսային մարմին՝ դա կայացնելուց հետո 10 օրվա ընթացքում կամ ՀՀ վարչական դատարան երկու ամսվա ընթացքում:

*Սույն որոշմամբ նշանակված տուգանքն անհրաժեշտ է վճարել 900005024055 հաշվեհամարին (ՀՀ պետական բյուջե, կենտրոնական գանձապետարան, Հյուսիսային մաքսատուն-վարչություն, ԿՈՂ 28):*

ՀՅՈՒՍԻՍԱՅԻՆ  
ՄԱՔՍԱՏՈՒՆ-ՎԱՐՉՈՒԹՅԱՆ ՊԵՏ



ՀԱՐՈՒԹՅՈՒՆ ԱԶԳԱՆԴՅԱՆ